

實戰篇：馬路上

由運輸署製作

喺馬路上，踩單車嘅人同揸車嘅人一樣，有權共用路面，但亦有同等責任去遵守交通規則，以及交通標誌、道路標記同燈號嘅指示。

例如，喺快速公路上係唔可以踩單車。而遇到有白底黑字圖案嘅紅邊圓形交通標誌，上面顯示單車或單車及行人圖案，並有紅色對角線蓋面，就代表呢啲道路亦唔可以踩單車嘞。

喺馬路上踩單車相對較為危險。出車前，一定要佩戴頭盔同着好保護裝備，亦要檢查好單車性能及車頭燈、車尾燈係咪操作正常。如果有需要喺馬路上踩單車或者運載貨物，就要非常小心，首要注重安全，時刻留意路面上嘅交通情況。

單車較其他車輛細小，速度一般相對較慢，所以踩單車人士要盡量畀其他駕駛者見到你，大家互諒互讓。

喺馬路上踩單車，要留意以下幾點：

第一，使用慢線，並喺安全情況下，靠左踩。盡量避開路面凹坑、雨水渠口、路釘、沙井、水渠蓋或路軌等。

第二，遇到比較狹窄嘅行車線或準備轉彎時，可以選擇喺行車線中央踩單車。但亦要善用避車處，讓路畀其他車輛駛過。

第三，超車、轉彎或停車前，都需要睇清楚四周交通情況，並打手號等其他道路使用者知道你嘅去向。

第四，唔好逆線行駛，或喺車間左穿右插。

第五，遇到斜路，必須控制好車速，預留較長嘅煞車距離，千祈唔好以高速落斜，否則好容易會因為單車失控而導致嚴重甚至致命嘅意外。

夜間路上車輛較少，但車速較快，視野冇日抖咁好，所以，一定要用安全速度踩單車。

去到路口、燈位、迴旋處或行人過路處等設施時，大家要特別小心。

睇清楚有無車輛或行人靠近，準備隨時慢駛或者停低。

喺燈位等候時，唔好同其他車輛並排等候，最好排喺車輛嘅後面，等前面嘅駕駛者可以喺倒後鏡裡面見到你。

嚟到迴旋處前，要讓路畀迴旋處內嘅車輛。

而喺迴旋處入面，就要全程喺外圍行車綫嘅中央踩單車。

當駛近要轉出嘅出口，要發出左轉手號。

離開迴旋處後，喺安全情況下先開始靠左行駛。

巴士、貨車等大型車輛，會比一般車輛有更多盲點。

靠近佢哋嘅時候要更加提高警覺，令駕駛者注意到自己。盡量遠離就會有更多應變空間。

要注意，小巴同的士可能會因為上落客而隨時停低，所以一定要經常同佢哋保持適當距離，以策安全。

踩單車首要注意安全。想知多啲喺馬路上踩單車嘅資料，可以登入運輸署嘅「單車資訊中心」網頁 www.td.gov.hk/mini_site/cic，參閱相關資訊。